

## Oqaaseqaatit nalinginnaasut

Siunnersuutigineqarpoq raajanut akitsuut, raajat akitsuusigassat tunineqarneranni isertitat procentiannik aalajangersimasumik angissuseqarunnaarluni allanngortinneqassasoq imaalillugu, raajat tunineqarneranni agguaqatigiissillugu kiilumut akiata 13,00 kr.-nit sinnerpagit aatsaat raajanut akitsuut allanngorartooq qaffagiartuaartorlu akilerneqartussanngorlugu.

Akitsuutip qaffagiartuaartup ilusissaatut siunnersuutaavoq, raajat akitsuusigassat tunineqarneranni agguaqatigiissillugu kiilumut akiata 13,00 kr.-inik annertussusillip aallaavittut 100,00-imut annertussusilerneqarnissaa. Tunisinermi akiusup kiilumut 13,00 kr.-nit sinnerlugit urimik ataatsimik nikinneri tamaasa aallaavik nikisinneqartassaaq. Aallaavik 100,0769-iuppat akitsuut 0,01 procentimik angissusilerneqassaaq, aallaaviullu 0,05 procentpointinik qaffattarnera ilutigalugu 0,01 procentimik qaffakkiartortassalluni, tassalu tunisinermi akiusooq agguaqatigiissillugu kiilumut 20 kr.-niuppat tamanna 7 procentimik akitsuuteqarnissamik kinguneqartassalluni.

Agguaqatigiissillugu aki kiilumut 13,00 kr.-niuppat taassumangaluunniit mikineruppat raajanut akitsuummik akiliisoqassanngilaq.

Agguaqatigiissillugu aki kiilumut 58,00 kr.-niuppat akitsuut qaffagiartuaartooq 45 procentiussaaq, taannalu raajanut akitsuutip qaffasinnerpaaffissaatut nalilerneqarpoq, akitsuuseeriaatsimmi siunnersuutigineqartup kingunerissammagu kiilumut aki 58,00 kr.-i qaangerlugu qaffariaatit 100 pct.-ii qaangerlugit annertussuseqartumik akitsuusiisooqartarnissaa.

### *Aningaasatigut kingunissai*

Taama inuussutissarsiutillit raajanik akitsuusigassanik tunisermikkut siunissami akigititassaasa ineriartornerat landskarsip raajanut akitsuutitigut isertitassaanut aalajangiisuussaaq. Ukiuni kingullerni pingasuni akit annertuumik nikerartarsimanerat naluneqanngilaq, maannakkullu 2003-mi kvartalimi kingullermi aatsaat taama appasitsigaluni kiilumut 13,98 kr.-niuvoq. 2002-mi agguaqatigiissillugu aki kiilumut 15,43 kr.-niuvoq, 2001-imi kiilumut 19,01 kr.-niulluni 2000-imilu kiilumut 22,88 kr.-niusimalluni.

Raajanut akitsuutip ukiumut 18 mio. kr.-nit missinginik isertitaqaataasarnissaa naatsorsuutigineqarpoq.

Piffissaq akitsuutininut akiliisussanngorfiq pillugu ikaarsaarutaasumik immikkut maleruagassiortoqanngilaq, tassami § 2, imm. 2-mi allassimareerpoq akitsuutininut akiliisussanngorneq piffissami tunisisup pisisumit aningaasanik pisassaqaliviffiani aallartissasoq, taamaammallu raajat suli pisarineqanngitsut tunineqarnissaannik isumaqatigiissutitigut iluanaarniarsinnaaneq periarfissaqanngitsoq, piffissaq

akiliiffissaq raajat tunineqarnissaat sioqqullugu pisussatut isumaqatigiissutaasimagaluarpalluunniit apeqqutaatinnagu.

### *Allaffissornermut kingunissai*

Inatsisissatut siunnersuutip allaffissornermut annertuunik kinguneqarnissaa naatsorsuutigineqanngilaq.

### *Tusarniaaneq*

Aalisarnermut, Piniarnermut Nunaqarfinnullu Pisortaqarfik, Inuussutissarsiornermut Pisortaqarfik aamma Aningaasaqarnermut Pisortaqarfik kiisalu KNAPK aamma APK inatsisissatut siunnersuut siunnersuutigineqaqqaarnermini (19 kr.) iluserqartillugu tusarniaaffigineqar-simapput. Raajanut akitsuuseeriaasissamut nutaamut tunngavissat APK-mit isumaqataaffi-gineqarput. Pisortaqarfiit taakku pingasut siunnersuummut oqaaseqaatissaqarsimangillat

Inatsisissatut siunnersuut maannakkutut iluseqartillugu (13 kr.) tusarniaavigineqarnikuunngi-laq.

## **Aalajangersakkanut ataasiakkaanut oqaaseqaatit**

### *§ 1, nr. 1-imut*

Raajanut akitsuutip procentiata aalajangersimasuujunnaarluni allanngorartunngornissaa siunnersuutigineqarpoq, tassa taama inuussutissarsiuteqartut raajat akitsuusigassat tunineranni akitigut angusaasa agguaqatigiissillugu angissusia tunngavigalugu aallaaviliussap, kvartalikkaartumik angissusilerneqartartussap procentinngorlugu ilaanik allanngorartumik angissuseqalersillugu.

Oqaatigineqassaaq akitsuutip tunngavia allannguuteqarani tassaammat raajanik akitsuusigassanik tunisinermi aki akitsuummik akiliisussaataasup pissarsiaa.

Aallaavissap, procentimik allanngorartumik akitsuusiinissamut tunngaviusussap, raajat akitsuusigassat kilisaatinit Kalaallit Nunaanni nalunaarsorneqarsimasunit pisarineqartut tunineqarneranni agguaqatigiissillugu kiilumut akiat aallaavigalugu angissusilerneqarnissaa siunnersuutigineqarpoq. Raajat akitsuusigassat umiarsuit nunanit allanit attartukkat atorlugit pisarineqarsimasinnaasut aallaavissamik naatsorsuinermi ilanngunneqarnissaat naleqquttuusorineqanngilaq, attartornermi

isumaqatigiissutit ilaatigut pissutigalugit. Oqaatigineqassarli raajat taakku tunineqarneranni akii aallaavissami ilaatinneqanngikkaluartut akitsuutinik akiliisussaataitaasup (aalisarsinnaanermut akuersissummik pigisaqartup) raajat akitsuusigassat, umiarsuit nunanit allanit attartukkat atorlugit pisarineqartut akitsuutaannik akiliisarnini aallaavissaq naapertorlugu ingerlatiinnassammagu.

Kvartalit tulleriiginnaat sisamat ingerlaneranni raajat akitsuusigassat tunineqarneranni agguaqatigiissillugu kiilumut akiisa aallaavissami ilaatinneqarnissaat siunnersuutaavoq, taamaaliornikkut aallaavissaq 2004-mi januarip kvartaliami raajanut akitsuutissap tunngavissaa, raajat akitsuusigassat 2002-mi oktoberip kvartaliami aammalu 2003-mi januarip, aprilip julillu kvartaliami tunineqarnerini agguaqatigiissillugu kiilumut akii tunngavigalugit angissusilerlugu. 2004-mi aprilip kvartaliami raajanut akitsuutissap naatsorsornissaanut aallaavissamik naatsorsuinissami raajat akitsuusigassat 2002-mi oktoberip kvartaliami tunineqarneranni agguaqatigiissillugu kiilumut akiat peerlugu raajat akitsuusigassat 2003-mi oktoberip kvartaliami tunineqarneranni agguaqatigiissillugu kiilumut akiannik taarserneqassaaq, tuliilu taamatutaaq pineqassapput.

Kvartalikkaartumik periusissap qulaani taaneqartup toqqarneqarneranut pissutaavoq Akileraartarnermut Pisorta qarfiup kvartalimi kingullermi tunineqarsimasut nalunaarutigineqarnerannik pissarsisarnermigut kvartalimi tullermi aallaaviusussaq ulluni 15. november, 15. februar, 15. maj aamma 15. august piffissaalluartillugu tamanut saqqummiuttarsinnaassammagu, tassuunakkut selskabit inuillu akitsuummik akiliisussaataitaasut akitsuutip procentiata kvartalimi aallartittussami annertussusissaa ilisimareertassammassuk.

Raajat akitsuusigassat tunineqarneranni agguaqatigiissillugu kiilumut akiata 13,00 kr.-nip aallaavissatut 100,00-imut angissusilerneqarnissaa siunnersuutaavoq. Raajat akitsuusigassat tunineqarneranni agguaqatigiissillugu kiilumut akiat 13,00 kr.-ni qaangerneqartillugu urret nikinneri tamaasa aallaavissaq aaqqiivigineqartassaaq. Aallaavissaq 100,0769-iuppat raajanut akitsuut 0,01 procentimik angissusilerneqassaaq, aallaavissallu 0,0769 procentpointimik qaffariarneri tamaasa 0,01 procentimik qaffariartassalluni.

Inatsisissatut siunnersuummut ilanngussatut ilanngunneqartumi takuneqarsinnaasutuut assersuutigineqarsinnaavoq, raajat akitsuusigassat kvartalit sisamat ingerlaneranni tunineqartut agguaqatigiissillugu kiilumut akiat 20 kr.-uppat raajanut akitsuut 7 procentiussaaq.

Qaffariaatit 100 procent sinnerlugu akitsuusiiffiginissaat anguniagaanngimmat siunnersuutigineqarpoq, agguaqatigiissillugu kiilumut akip 58,00 kr.-uneratigut raajanut akitsuutip 45,00 procentiusup raajanut akitsuutip qaffasinnerpaaffigissagaa.

Imm. 1 aamma imm. 6 siusinnerusumut sanilliullugit allannguuteqanngillat.

Siunnersuutigineqarpoq suliffeqarfiit akitsuummik akiliisussaataasut raajanik akitsuusigassanik tunisaqarnerminnik, aallaavissap naatsorsorneqarnissaanut atorneqartussamik naatsorsuusiortarnissaat. Raajat akitsuusigassat tunineqartut naatsorsuusiorneqarnerata taassuma suliffeqarfiit akitsuummik akiliisussaataasut, akitsuutip naatsorsorneranut aammalu akitsuutip eqqortumik akilerneqarnissaanik nakkutilliinermut tunngaviusussanik allattuisartussaareernerat assigiinnarpaa.

*§ 2-mut*

Inatsisartut inatsisaata ulloq 1. januar 2004-miit atortuulernissaa siunnersuutigineqarpoq.